

C40  
4514

C40-4574

了觀一塵請大嚴及有  
家書其說謂此雲山  
我徵安塔院庭府中永  
為學者不敢許出院內  
當山二世鐵牛擬蓮誌



B 64853

西方合論卷之六

第六稱性門

夫一切賢聖稱心而行法性無邊行海叵量是故或  
二刹那中行滿三祇或恒河沙劫未成一念飛空鳥  
跡辦地位之分齊淚日風花明過現之影像無塵而  
走舍阿彌以何之不疾而速識西方之非遠辟諸五  
色至玄而亡萬流以海為極者也今約大乘諸行總  
入一行略示五門

一信心行

二止觀行

三六度行

四悲願行

五稱法行

一信心行者經云信爲道元功德母一切諸行無不以信爲正因乃至菩提果滿亦只完此信根如谷子墮地迫于成實不異初種如稚筍叅天暨至叢葉本是原筍初心菩薩無不依是信力而成就者是故蓮宗門下全仗此信爲根本一者信阿彌陀佛不動智根本智與已無異如一大虛空日映則明雲來則翳虛空本無是故又則雲與日皆卽虛空故二者信阿

彌陀佛從發願來那由他劫內一切難行難忍種種修習之事我亦能行何以故自憶無始劫中漂溺三塗生苦死苦披毛戴角苦鐵床銅柱苦一切無益之苦皆能受之何況如今菩薩萬行濟衆生事豈不能爲三者信阿彌陀佛無量智慧無量神通及成就無量願力等事我亦當得何以故如來自性方便具有如是不思議事我與如來同一自體清淨性故四者信阿彌陀佛不去不來我亦不去不來西方此土不隔毫端欲見卽見何以故一切諸佛皆以法性爲身土故五者信阿彌陀佛修行歷劫直至證果不移刹

那我今亦不移剎那位齊諸佛何以故時分者是業收法界海中業不可得故如是信解是謂入道初心信一切諸佛淨土之行

二止觀行者如圓覺楞嚴華嚴諸方等經古今學者廣設觀門唯台宗三觀最爲直捷示一心之筌蹄撮諸法之要領修行徑路無踰于此西方宗旨自有十六正觀然一一觀中具舍此三義故天台詮經直以三諦攝彼十六妙宗鈔曰性中三德體是諸佛三身卽此三德三身是我一心三觀若不然者則觀外有佛境不卽心何名圓宗絕待之觀亦可彌陀三身以

爲法身我之三觀以爲般若觀成見佛卽是解脫舉一具三如新伊字觀佛旣爾觀諸依正理非異塗廣如疏鈔不能具述至若溫陵禪師則純以念佛一聲入三觀門言念存三觀者如一聲佛遂了此能念體空所念無相卽念存空觀所念之佛卽應身卽心破見思惑也雖能念體空所念無相不妨能念分明所念顯然卽念存假觀所念之佛卽報身卽心破塵沙惑也正當能念所念空時卽能念所念顯然正當能念所念顯時卽是能念所念寂然空假互存乃念存中觀所念之佛卽法身卽心破無明惑也是又卽念

佛因究竟三諦淨彼四土如拈一微塵變大地作黃金是謂法界圓融不可思議觀門

三六度行者起信論曰菩薩從初正信已來於第一阿僧祇將欲滿故於真如法中深解現前所修離相知法性體離慳貪故隨順修行檀波羅蜜法性無染離五欲過故隨順修行戒波羅蜜法性無苦離瞋惱故隨順修行忍波羅蜜法性無身心相離懈怠故隨順修行精進波羅蜜法性常定體無亂故隨順修行禪波羅蜜法性體明離無明故隨順修行般若波羅蜜故智度論曰菩薩觀一切法畢竟空不生慳貪心

何以故畢竟空中無有慳貪慳貪根本斷故乃至般若波羅蜜畢竟空故常不生痴心所以者何佛說一切法無施無受非戒非犯乃至不智不愚故又云菩薩雖不見布施以清淨空心布施作是念是布施空無所有衆生須故施與如小兒以土爲金銀長者則不見是金銀便隨意與竟無所與其餘五法亦復如是是謂菩薩行于六度修淨土者卽無如是差別名相然亦不越一行具此六義一者捨諸雜念是行于施又則繫佛不住捨念是性施故二者念念中淨是行于戒又則繫佛不求滅念是性戒故三者世念盡

弱是行于忍又則繫佛非關摧念是性忍故四者畢  
念不退是行精進又則一念卽是不着苦行是性精  
進故五者得念三時是行于定又則念念是佛不貪  
禪味是大定故六者了念佛因卽念而佛是行于智  
又則念本非有佛本非無不落斷常是一切種智故  
是故念佛一門此該諸行何以故念佛是一心法門  
心外無諸行故然亦不廢諸行若廢諸行卽是廢心  
故

四悲願行者諸佛菩薩性海無盡供養無盡戒施無  
盡乃至饒益無盡如普賢發十大願虛空界衆生界  
無有盡時而我此願亦無有盡身語意業無有疲厭  
名爲願王一切諸佛無不成就如是願王證涅槃果  
故天親菩薩淨土五念門以禮拜讚歎作願觀察前  
四種爲成就入功德門回向一切煩惱衆生拔世間  
苦爲成就出功德門菩薩修五念門速得阿耨多羅  
三藐三菩提難曰佛及衆生本無所有如淨名經言  
菩薩觀于衆生如呼聲響如水聚沫如芭蕉堅如電  
久住如無色界色如蕉穀芽如得忍菩薩貪恚毀禁  
如佛煩惱習如夢所見已寤菩薩觀衆生爲若此是  
則衆生本空菩薩種種發願利生將無眼見空華邪

答曰智度論中佛說此中言無佛者破著佛想不言  
取無佛相是故當知言無衆生者破衆生想不言取  
無衆生相如淨名言菩薩作是觀已自言我當爲衆  
生說如斯法卽真實慈卽知菩薩不取無衆生相又  
則說是法者真實利生真實悲願無別度衆生事也  
又如般若經菩薩深入大悲如慈父見子爲無所值  
物故死父甚憐之此兒但爲虛誑故死諸佛亦如是  
知諸法空畢竟不可得而衆生不知衆生不知故于  
空法中染著著因緣故墮大地獄是故深入大悲是  
則諸佛興慈運悲正以衆生空故衆生誰入生死故

豈有反息悲願之理故知菩薩種種度生者是深達  
無衆生義何故若見有衆生故卽有我慈悲心劣豈  
能行如是饒益之行又先德云未居究竟位全是自  
利門從十信初心歷十住十行十迴向十地直至等  
覺佛前普賢猶是自利利他門者登妙覺位佛後普  
賢方是利他之行如佛告比丘功德果報甚深無有  
如我知恩分者我雖復盡其邊底我本以欲心無厭  
足故得佛是故今猶不息雖更無功德可得我欲心  
亦不休當知行海無邊非丈竿尺木所能探其底裏  
如痴兒見人指門前竿云在天半卽計量言從地至

天止兩竿許佛法戲論亦復如是

五稱法行者法界海中無量無邊菩薩行海亦無量無邊虛空着彩粉墨徒勞法界無方轍跡安用是故菩薩自性行者非有非無非行非不行唯是稱法自在之行一者菩薩度一切衆生究竟無餘涅槃而衆生界不減如登場傀儡悲哀宛然唯一土泥空無所有是稱法行二者菩薩行五無間而無惱恚至于地獄無諸罪垢至于畜生無有無明憍慢等過如淫女離蒐逐所歡去乃至生子而身常在父母前是稱法行三者菩薩自身入定他身起定一身入定多身起

定從有情身入定從無情身起定如猛虎起屍跪拜作舞唯虎所欲而屍本無知是稱法行四者菩薩于一小衆生身中轉大法輪燃大法炬震大法雷魔宮摧毀大地震動度無量無邊衆生而此小衆生不覺不知如天帝樂人逃入一小女子鼻孔徧索不得而此女子不覺不知是稱法行五者菩薩欲久住世卽以念項作無量無數百千億那由他劫欲少住世卽以無量無數百千億那由他劫縮爲念項如小兒看燈中走馬計其多寡首尾了不可得是稱法行是故若證如是不思議行者一念之中三世諸佛淨土



攝入無餘是謂菩薩莊嚴淨土之行以無思智照之  
可見非是情量所能猜度何以故以自性超一切量  
故

皖浮渡山始光居士吳用先校

西方合論卷之六 終

西方合論卷之七

第七往生門

夫究竟涅槃唯除如來二乘破有執空假名寂滅菩  
薩發真無漏分破無明何况劣根淺解大海一滴輒  
逞狂慧斷無後有以恣情爲游戲以修行爲纏縛自  
殺殺他何異鴆毒如佛在時有一比丘得四禪生增  
上慢謂得阿羅漢不復求進命欲盡時見有四禪中  
陰相來便生邪見謂無涅槃佛爲欺我惡邪生故失  
四禪中陰便見阿鼻泥犁中陰相命終卽生阿鼻地  
獄此等猶是坐禪持戒一念妄證遂沉黑獄而今禪

人得少爲足蕩心逸軌其惡報又不知當如何也古人云不生淨土何土可生三祇途遠入餘門者多有退墮是以古今聖流皆主張此一門今略示六種以定指南

一菩薩生人中者

二菩薩生兜率天者

三菩薩生長壽天者

四菩薩生三界外者

五菩薩初發心時生如來家者

六菩薩三祇行滿生十方世界利益一切衆生者

一菩薩生人中者如般若經云有菩薩人中命終還生人中者除阿毘跋致是菩薩根鈍不能疾與般若波羅蜜相應諸陀羅尼門三昧門不能疾現在前夫入水火宅百苦相纏唯大菩薩處之則無染累如鷲何由得諸三昧如舍利弗于六十劫行菩薩道欲渡布施河時有乞人來乞其眼舍利弗出一眼與之乞者得眼于舍利弗前嗅之唾而棄地又以腳踏舍利弗思惟言如此弊人等難可度也不如自調早脫生死思惟是已于菩薩道退廻小乘又如飛行仙人以

王夫人手觸神通頓失迦文往因以歡喜九媚藥暱  
就姪女賢聖猶爾何况初心豈若一念阿彌三昧疾  
現寄質蓮邦永離貪欲者哉論曰菩薩以不見現在  
佛故心鈍卽知菩薩常當近佛以近佛根利疾得般  
若故

二菩薩生兜率天者爲一生補處菩薩皆生兜率菩  
薩欲隨下生者亦生彼處十疑論曰兜率天宮是欲  
界退位者多又有女人長諸天愛欲天女微妙諸天  
耽玩自不能捨不如阿彌淨土純一大乘清淨良伴  
煩惱惡業畢竟不起遂致無生之位如獅子覺菩薩

生彼爲受天樂從去已來總不見彌勒諸小菩薩尚  
着五欲何況凡夫又彌勒上生經得入正定方始得  
生更無方便接引之義是則兜率內院尚不求生何  
况欲界諸天妙欲之藪豈有需飲而入焦石之鄉避  
溺而沉大海之底者哉

三菩薩生長壽等天者智度論曰菩薩無方便入初  
禪乃至行六波羅蜜無方便者入初禪時不念衆生  
住時起時不念衆生但着禪味不能與初禪和合行  
般若波羅蜜是菩薩慈悲心薄故功德薄少爲初禪  
果報所牽生長壽天長壽天者非有想非無想處壽

八萬大劫或有人言一切無色定通名長壽天以無形不可化故不任得道常是凡夫處故或說無想天名爲長壽亦不任得道故或說從初禪至第四禪除淨居天皆名長壽以着味邪見善心難生故如經中說佛問比丘甲頭土多地上土多諸比丘言地上甚多不可爲喻佛言天上命終還生人中者如甲頭土墮地獄者如地土何以故以本發阿耨多羅三藐三菩提心或於禪中集諸福德方得還生人中聞佛法故若是最初發心求生淨土卽常得聞法直至不退豈有如是等過

四菩薩生三界外者有二種一二乘三種菩薩折伏現行煩惱捨分段而生界外悲智狹劣于嚴土利他不生喜樂爲如來所呵若不廻心行六度等行畢竟不入大乘智海二法身菩薩如般若經佛告舍利弗有菩薩摩訶薩得六神通不生欲界色界無色界從一佛國至一佛國供養恭敬尊重讚歎諸佛舍利弗有菩薩摩訶薩遊戲神通從一佛國至一佛國所至到處無有聲聞辟支乃至無二乘之名舍利弗有菩薩摩訶薩所至到處其壽無量釋曰菩薩有二種一者生身菩薩二者法身菩薩法身菩薩斷結使得六

神通生身菩薩不斷結使或離欲得五神通得六神通者不生三界所至世界皆一乘清淨壽無量阿僧祇劫菩薩生彼爲樂集諸佛功德故當知菩薩具六神通方得生彼甚爲希有凡夫往生者以佛力故又則念力不可思議以念念中具六神通故

五菩薩初發心時生如來家者爲上上根人頓示本智初心創發十住位上卽與佛同如華嚴經有一類菩薩經百千億那由他劫行六波羅蜜不生佛家猶是假名菩薩以雖見佛性未<sup>前</sup>發<sup>後</sup>業長者決疑論云初發心住明以從禪定顯得根本空智慧門無明始

謝智慧始明初生如來智慧之家名住佛所住故得憶念一切諸佛境界智慧光明普見法門以此見道無古今中邊等見經歷五位鍊磨習氣增長慈悲名爲修道故言初發心時便成正覺方可修道如善財南行求諸勝友皆云我已先發阿耨多羅三藐三菩提心云何學菩薩行修菩薩道不云增長佛道爲根本智以定顯得無作無修但學菩薩行根本智自明自顯若不得正覺之體諸行並是無常皆是人天有生死業報也又云經此現生一生發心相應時得以至智于分段身觀行心成兼修善業來生入變易身

以今生分段之身是過去作業今身以智修觀行業  
來生得神通變化生也如十善業尚生天上得業報  
神通如龍大力鬼尚以無明惡業猶有神通何況道  
眼開敷慈善根力使智神用一生作意而于來世不  
獲大用神通者也宗鏡錄曰初心成佛者非謂不具  
諸功德如經說普莊嚴童子一生得聞善熏習二生  
成其解行三生得入果海同一緣起而此三生只在  
一念猶如遠行到在初步然此初步之到非謂無于  
後步明此童子得入果海非不久植善根問既久修  
始得云何言一念得邪答言久修善根者卽在三乘

教攝從三乘入一乘卽是一念始修足故經云初發  
心時便成正覺譬衆川入海纔入一滴卽稱周大海  
無始無終若餘百川水之極深不及入大海之一滴  
卽同三乘中修多劫不及一乘之一念又此時劫不  
定或一念卽無量劫如十玄門時處無礙又大乘明  
一念成佛有二一者會緣以入實性無多少故明一  
念成佛二者行行纔滿取最後念名爲一念成佛如  
人遠行以後步爲到若一乘明一念成佛者如大乘  
取後一念成佛卽入一乘以後卽初初念卽是成何  
故以因果相卽同時相應故然一念成者卽與佛同

位未具究竟故復有淺深之殊如人始出門及以久  
遊行他土雖同在空中而遠近有別是故十信十住  
等五位各各言成佛而復辯其淺深此中須善思之  
若二大士言卽知禪門悟達之士不得廢一切行銷  
磨無始結習也夫居此濁惡進一退萬若不近佛垢  
膩交集行何由成如善財初發心悟道時德雲比丘  
教以憶念一切諸佛法門及入彌勒閣後普賢菩薩  
爲發十大願王導生極樂此是一切如來入道榜樣  
華嚴所說一真法界門不同餘教有權有實是經不  
信卽真闡提雖使釋迦讚歎普賢勸進彌勒作證亦

末如之何也矣

六菩薩三祇行滿生十方世界利益一切衆生者菩  
薩功德成滿自然有不思議業能現十方利益衆生  
起信論曰證發心菩薩于一念項能至十方無餘世  
界供養諸佛請轉法輪唯爲開導利益衆生不依文  
字或示超地速成正覺爲怯弱衆生故或說我于無  
量阿僧祇當成佛道爲怠慢衆生故而實菩薩種性  
根等發心則等所證亦等無有超過之法以一切菩  
薩皆經三阿僧祇劫故如智度論言釋迦世尊從過  
去釋迦文佛至尸棄佛爲初阿僧祇從尸棄佛至然

燈佛授記時爲二阿僧祇從然燈佛至毗婆尸佛爲  
三阿僧祇婆沙論叙三阿僧祇劫修六度行百劫種  
相好因然後獲五分法身唯識謂地前歷一僧祇初  
地滿二僧祇八地至等覺是三僧祇然後獲究竟法  
身難曰長者合論皆云不離一念歷阿僧祇何得執  
定永劫垂第一義答曰長者但言三祇本空時體不  
可得非是無時如人眼耳鼻舌身現在說六根本無  
不是廢却六根言無也辟如小兒見水中月心生愛  
著欲取而不可得智者教言是可眼見不可手捉但  
破可取不破可見諸佛菩薩三世行業亦然雖一切

不可得而非是無行且如龍樹馬鳴二大菩薩皆是  
禪門傳衣之祖豈肯自誑誑他誤賺後來當知生死  
事大非是一知半行所能跳出智度論曰有菩薩利  
根心堅未發心前久來集諸無量福德智慧是人遇  
佛聞是大乘法發阿耨多羅三藐三菩提心卽時行  
六波羅蜜入菩薩位得阿鞞跋致地所以者何先集  
無量福德利根心堅從佛聞法故譬如遠行或有乘  
羊而去或有乘馬而去或有神通去者乘羊者久久  
乃到乘馬者差速乘神通者發意頃便到如是不得  
言發意間云何得到神通相爾不應生疑菩薩亦如



是發阿耨多羅三藐三菩提時卽入菩薩位有菩薩  
初發意初雖心好後雜諸惡時時生念我求佛道以  
諸功德迴向阿耨多羅三藐三菩提是人久久無量  
阿僧祇劫或至或不至先世福德因緣薄而復鈍根  
心不堅固如乘羊者有人前世少有福德利根發心  
漸漸行六波羅蜜若三若十若百阿僧祇劫得阿耨  
多羅三藐三菩提如乘馬者必有所到第三乘神通  
者如上說是知漸修頓證各各不同菩薩欲取佛位  
無驟至者故先德云雖齊佛覺未逮極果非爲究竟  
是故悟達之士決當求生淨土如法修行免致退墮

俟忍力堅固入世利生方爲究竟佛果故

石洋居士王珍校

西方合論卷之七 終

西方合論卷之八

第八見網門

夫一切迷情依諸見起履之則爲稠林溺之則爲熱海如蠶作繭卽住處爲受縛之因似蛾赴燈依光明作喪生之本故先達云行起解絕所以將趨聖室先入普賢之門欲脩正因首割邪見之網今約諸家負墮畧分十則無法可捨是見必訶拋家蕩子慣憐羈旅之人落地寒生備識窮途之苦幸順佛言莫依魔教

一斷滅墮

二怯劣墮  
三隨語墮  
四狂恣墮  
五支離墮  
六癡空墮  
七隨緣墮  
八唯心墮  
九頓悟墮  
十圓實墮  
一斷滅墮者有二種一諸儒生滯現在身疑未來斷

滅二新發意學人執空相疑一切斷滅此等尚不信  
有生云何信往生及淨土等事今爲畧釋一釋儒生  
等者楞嚴經佛告波斯匿王汝今自傷髮白面皺其  
面必定皺于童年則汝今時觀此恒河與昔童時觀  
河之見有童耄不王言不也佛言大王汝面雖皺而  
此見性未曾皺皺者爲變不皺非變變者受滅彼不  
變者元無生滅云何于中受汝生死而言此身死後  
全滅智度論問曰人死歸滅滅有三種一者火燒爲  
灰二者蠱食爲糞三者終歸于土今但見其滅不見  
更有出者受于後身以不見故則知爲無答曰若謂

身滅便無者云何有衆生先世所習憂喜怖畏等如  
小兒生時或啼或笑先習憂喜故今無人教而憂喜  
續生又如犢子生知趣乳猪羊之屬其生未幾便知  
有牝牡之合子同父母好醜貧富聰明闇鈍各各不  
同若無先世因緣者不應有異如是等種種因緣知  
有後世又汝先言不見別有去者人身中非獨眼根  
能見身中六情各有所知有法可聞可嗅可味可觸  
可知者可聞法尚不可見何況可知者有生有死法  
亦可見亦可知汝肉眼故不見天眼者了了能見如  
見人從一房出入一房捨此身至後身亦如是若肉

眼能見者何用求天眼若爾者天眼肉眼眼愚聖無異  
汝以畜生同見何能見後世可知者如人死生雖無  
來去者而煩惱不盡故于身情意相續更生身情意  
身情意造業亦不至後世而從是因緣更生受後世  
果報譬如乳中著毒乳變爲酪酪變爲酥乳非酪酥  
酪酥非乳乳酪雖變而皆有毒此身亦如是今世五  
衆因緣故更生後世五衆行業相續不異故而受果  
報又如冬木雖未有華葉果實得時節會則次第而  
出于是因緣故知有死生復次現世有知宿命者如  
人夢行疲極睡卧覺已憶所經由又一切聖人內外

經書皆說後世復次現世不善法動發過重生瞋恚嫉妬疑悔內惱故身則枯悴顏色不悅惡不善法受害如是何况起身業口業若生善法淨信業因緣心清淨得如實智慧心則歡悅身得輕軟顏色和悅以有苦樂因緣故有善不善今定有善不善故當知必有後世但衆生肉眼不見智慧薄故而生邪疑雖修福事所作淺薄譬如藥師爲王療病王密爲起宅而藥師不知既歸見之乃悔不故意盡力治王復次聖人說今現在事實可信故說後世事亦皆可信如人夜行險道導師授手知可信故則便隨逐比智及聖

人語可知定有後世汝以肉眼重罪比智薄故又無天眼既自無智又不信聖語云何得知身後如宣聖言費隱則言鬼神德盛明明說道武周達孝唯在識鬼神之情狀事死如事生處而考亭先生曲爲解說歸之二氣何其敢于誣先聖疑後來耶且稗官野史不足論如彭生爲豕伯有爲厲劉聰爲遮須國王蔣濟之子乞官于泰山令則正史也玄鳥生商帝武肇周則正經也雀化蛤田鼠化鴛鷹化鳩則正令也一微塵識所知幾何擬欲蛙嫌海量螢撩日光侮聖襲天當得何罪又談者恒言非人所經歷及道理不可

信者卽不足憑如日月度數及五星往來非人所得  
經歷也天不來此人亦不往彼何以推測皆驗又天  
尙爲高地何爲卑風何爲起雲何爲行春何爲生秋  
何爲殺此有何道理可憑胎中之根無知而轉字母  
之乳無因而出此有何道理可憑微而至于一毛一  
塵一草一木若有毫頭許道理可憑幸爲指出不過  
常見故則常之此常見者亦復無理是故不應以不  
見故而疑往生二釋學道執空相者論曰學人聞說  
空于生死業因緣中生疑若一切法畢竟空無去無  
來無出無入云何死而有生現在眼見法尚不應有

何況死後復生餘處不知佛法中諸法畢竟空而亦  
不斷滅生死雖相續亦不是常無量阿僧祇劫因業  
緣雖過去亦能生果報而不滅是爲微妙難知若諸  
法都空佛不應說往生何有智者前後相違若生死  
相實有云何言諸法畢竟空但爲除諸法中愛著邪  
見顛倒故說畢竟空不爲破後身又爲遮罪業因緣  
故說種種往生佛法不著有不著無有無亦不著非  
有無亦不著不著亦不著如是人則不容難如以刀  
斫空則無所傷是爲畢竟空相畢竟空不遮生死業  
因緣是故說往生此疑甚淺少有知者皆能斷之以

世間人作此見最多故首破之爲是求往生者之第一障難故

二怯劣墮者一疑結習濃厚二疑念力輕微三疑萬憶利遠一疑結習濃厚者凡夫但知業力不知業性空故所以若衆生業性實者盡虛空界亦無容受處如黑雲障空風至則滅若雲實者吹亦不去虛空喻性黑雲喻業念佛喻風又則業性卽是法性力用至大以結使故神力不現如烏芻瑟摩聞空王佛說多姪人成猛火聚却後徧觀四支百骸諸冷煖氣神光內變化多姪心成智慧火夫同一熱惱方其姪成大

火聚及其離成大寶燄若姪姓實者云何是中而得三昧是故迷成則處胎獄念成卽入蓮胞以胎性卽是化性非從外來如濁水中清非外來故二疑念力輕微者衆生愚昧信有形之行業大不信無形之念力尤大何故念力是行業根一切事業非念不成如人造罪無心造者重得輕報有心造者反是以念力重故如人無記時流俗鄙事耳提面囑亦復不記若心在者種種難記之事一入耳根終身憶持不忘以念力堅故蘇子瞻曰佛以大圓覺充滿十方界我以顛倒想出沒生死中云何以一念得往生淨土我造

無始業本從一念生既從一念生還從一念滅生滅  
滅盡處則我與佛同如投水海中如風中鼓橐雖有  
大聖智亦不能分別淨土矣云人之念頭所係最急  
如水之必赴海如火之必炎上如利刃之必傷如毒  
藥之必殺無空過者念佛之念亦復如是如姪男子  
姪念堅故化爲猛燄延燒神廟又如月光童子觀想  
水故弟子窺屋唯見清水又如僧清辯與外道論議  
外道堅執已見忽化爲石清辯猶書目石石上明日  
往視之亦有答辭久之忽自破碎而吼聲于空中是  
等皆以念力堅猛無因變化云何念佛而佛不現當

知念力是一切法中之王如摩訶伽伽大力勇士怒  
時額上必生瘡瘡若未合遍閻浮提人無敵者故三  
疑億萬剎遠者凡夫執定十萬億剎意謂快馬疾帆  
日不千里云何剎那得生彼處不思國土遠近者從  
分段身計度生從肉眼生此往生者爲是分段身耶  
爲是周徧含容之心耶若分段身者是頑質云何  
得生若心生者心周沙界淨土原在心中焉有往來  
如人在長安思鄉或聞或滇隨念卽至豈有程途又  
如人夢時身雖在床而心意識遍至他方無功居士  
曰極樂去此十萬億剎凡夫命終頃刻卽至者蓋自



心本妙耳故楞嚴云汝猶未明一切浮塵諸幻化相  
常處出生隨處滅盡因緣和合虛妄有生因緣別離  
虛妄名滅以此推之當命終時染濁緣離故娑婆當  
處幻滅清淨緣合故極樂當處幻生此滅彼生間不  
容髮亦何頃刻之可論往余鄉有人能致乩乩仙  
者卽其兄也後赴選京師余兄等有所卜其人虞地  
遠不能赴不得已書符宣詞少頃卽至此等是業繫  
尚如是速疾何況不思議念力仗阿彌陀本願功德  
順水張帆有何障難是故念佛之人應當遣此三疑  
若不遣者是真結習濃厚是真念力輕微是真十萬

程遠如人欲出門而自扃其籬是自不欲出非無門  
過

三隨語墮者六祖言東方人造罪念佛求生西方西  
方人造罪念佛求生何國龐居士云事上說佛國此  
去十萬里大海渺無邊動卽黑風起因此一輩無知  
傳虛接響謂淨土不足修自障障他深可憐憫夫論  
宗門提唱尚不言有佛何況佛國爲欲破相明心是  
非俱剗如吹毛利刃執則傷手金剛栗棘豈是家常  
茶飯且宗門中此等語句甚多若一一執之釋迦老  
子出世將真以餉雲門狗子乎又古德云如何是佛

乾屎橛果爾則凡見糞車糞担溷廁應當一一禮拜  
供養彌陀疏鈔曰西方去此十萬億土壇經言十萬  
八千者是錯以五天竺等爲極樂也此語近是爲六  
祖未閱大藏聞人說西方卽以爲五天竺者有之教  
中分明言極樂國三毒不生得不退轉今言西方造  
罪求生何土此亦一證也然宗門中此等一期之語  
最多亦不足辯噫學人果能頓悟頓修解行相應如  
六祖投金漢水遊戲生死中如龐老雖不求生亦何  
害于生哉

四狂恣墮者有等魔民專逞狂慧不肯持戒修行妄

引經中相似語言如煩惱卽菩提姪怒癡卽梵行之  
類隨語生解隨解發毒果如彼說迦文悟道應親寶  
女阿難姪舍何須提獎六祖初隨獵人尚未受戒何  
苦但食肉邊菜也經云尚無不殺不盜不姪何況更  
有殺盜姪事豈有聞人呵沉水香便謂應住坑廁者  
也昔五天有僧達磨達者有辨慧師事師子尊者尊  
者知其悟解對衆稱之至傳法嗣祖則以授婆舍斯  
多磨達心恨之曰尊者蓋知我之深何故嗣位不以  
見授一日獨行渡水有女子浣露其足磨達念曰此  
脛白皙乃爾尊者忽在旁曰今日之心可授祖位乎

磨達于是攝念禮足求哀卽一姪戒餘行可例般若  
經曰罪不罪不可得故應具足尸羅波羅密釋云罪  
不罪不可得者非爲邪見粗心言不可得菩薩深入  
諸法相行空三昧慧眼觀故罪不可得罪無故不罪  
亦不可得若人貪著無罪見破戒罪人則輕慢見持  
戒善人則愛敬如是持戒是名起罪因緣不各具足  
故知住戒卽破何況棄毀戒執亦戒始名持戒諸大  
經言梵行不可得等皆卽此義末明曰帶習尚被境  
牽現行豈逃緣縛猶醉象無鈎痴猿得樹奔波乍擁  
生身被籠是故菩薩稟戒爲師常懷大懼又曰末代

宗門中學大乘人多輕戒律所以大涅槃經扶律談  
常則乘戒俱急故號此經爲續常住命之重寶何以  
故若無此教但取口解脫全不修行則乘戒俱失故  
乘謂悟第一義戒謂止一切黑業祖師于此分四料  
簡一戒急乘緩以戒急故生人天中如箭射空力盡  
還墜以乘緩故雖聞大法如聾若啞二乘急戒緩以  
戒緩故生惡趣中以乘急故常聞大法如華嚴會上  
八部鬼神是也三乘戒俱急則生人天中而常聞大  
法四乘戒俱緩則墮三惡道而永不聞法是故乘戒  
三法如車二輪廢一不可得故龍樹曰破戒之人如

清凉池而有毒蛇不中澡浴其家如塚人所不到失  
諸功德譬如枯樹如田被雹不可依仰如大病人人  
不欲近譬如吐食不可更噉菩薩如是苦口呵責曾  
許人破戒不是故千日學解不如一日持戒何得貪  
悟道之虛名受泥犁之實禍欺已誑人枉遭王難夫  
狂吠之人無所不破今獨言戒者以邪見惡火首燒  
戒寶故又則戒是淨業之基一切白法由戒生故  
五支離墮者多有法師涉獵教典記注章句執法身  
之假名析名相之分齊東緝西補竟月窮年弄毘盧  
之畫面坐法界之排場貢高我慢得少爲足聞人念

佛則曰此小乘中攝妄想之一法或云教海義深爾  
輩鈍根念此亦可或云此三藏中爲某藏攝或云此  
屬何教似坊上小兒闖曲以多爲勝各爭已見無實  
行履如長爪梵志以論議力摧伏諸師摑撲蹴蹋無  
能制者後至佛所作是念一切論可破一切執可轉  
是中何者是諸法實相何者是第一義何者性何者  
相不顛倒作是思惟已白佛言瞿曇我一切法不受  
佛問梵志爾一切法不受是見受不梵志答言瞿曇  
一切法不受是見亦不受佛語梵志汝不受一切法  
是見亦不受則無所受與衆人無異何用貢高而生

西乃合論卷八  
十一  
憍慢如是梵志不得答自是服膺是故當知饑兒過  
屠門大嚼止益饒心無救朽腹昔在江南有一靈俐  
座主爲余辯析惟識及示所得教中奧義于諸名流  
注疏多肆評駁余問曰是可敵得生死不僧傲然曰  
有何生死可敵余曰是卽是但恐閻羅殿前無譯字  
生不會座主語言三昧也此雖一時戲笑亦大中講  
席之病奉勸少年開士長篇短章牽藤引蔓口誦心  
憶腦昏眼昧究其效驗不過上幾迴座講幾期經受  
幾個瞎漢禮拜若無真實功行唯添業債何若一聲  
阿彌直登不退事一功百如曇謨最講涅槃華嚴領

衆千人爲閻羅所呵云講經者心懷彼我以驕凌物  
比丘中第一麓行卽押付司可爲明戒然有義解高  
流因叅教典悟此西方不思議大事以此自利利他  
轉益未來燃長夜炬功德無量又何必懲噎廢食見  
蹶停蹇哉

六癡空墮者學道之人稍窺法空聞人念佛卽曰法  
離名字若徇假名轉益虛妄何故文言尚空何況名  
號答法句經曰佛告寶明菩薩汝且觀是諸佛名字  
若是有說食與人應得充饑若名字無者定光如來  
不授我記及于汝名如無授者我不應得佛當知名

字其已久如以我如故備顯諸法名字性空不在有  
無華嚴經曰譬如諸法不分別自性不分別音聲而  
自性不捨名字不滅羣疑論曰若言名字無用不能  
詮諸法體亦應喚水火來故知筌蹄不空魚兔斯得  
稱斯弘名生實淨土何得言虛天台智者曰世間有  
空行人執其癡空不與修多羅合聞此觀心而作難  
言觀心是法身等應觸處平等何故經像生敬紙木  
生慢敬慢異故則非平等非平等故法身義不成答  
我以凡夫位中觀如是相耳爲欲開顯此實相恭敬  
經像令慧不縛使無量人崇善去惡令方便不縛豈

與汝同耶上都儀曰夫皈命三寶者要指方立相住  
心取境不明無相離念也佛懸知凡夫繫心尚乃不  
得况離相耶如無術通人居空造舍也法華經曰汝  
證一切智十方等佛法具三十二相乃是真實滅南  
泉大師曰微妙淨法身具相三十二祇是不許分劑  
心量若無如是心一切行處乃至彈指合掌皆是正  
因百丈和尚曰行道禮拜慈悲喜捨沙門本事宛然  
依佛勅祇是不許執著淨土指歸曰圓頓行人語默  
動靜皆遵聖教盡合佛心若以念佛生心動念成妄  
想者則息心無念亦成妄想楞嚴經云縱滅一切

見聞覺知內守幽閑猶爲法塵分別影事若以念佛  
著有爲患則執空之人其患尤甚永嘉云豁達空撥  
因果濟滄蕩蕩招殃禍若以外求他佛爲未達則內  
執已心不達尤甚長沙云學道之人不識真只爲從  
來認識神無量劫來生死本癡人喚作本來人若以  
別求淨土爲偏見則執目前爲淨土者其失尤甚楞  
嚴經說落魔道者都指現前卽爲佛國無別淨居及  
金色相口中好言眼耳鼻舌皆爲淨土男女二根卽  
是菩提弟子與師俱陷王難迷惑無知墮無間獄若  
以執有修證爲權說者執無修證墮落外道其禍尤

甚楞嚴經曰若彼定中諸善男子見色陰消受陰明  
白自謂已足則有一分大我慢魔入其心腑謂三祇  
劫一念能越心中尚輕十方如來何況下位聲聞緣  
覺不禮塔廟摧毀經像謂檀越言此是金銅是土木  
經是樹葉或是疊華肉身真常不自恭敬却崇土木  
實爲顛倒疑悞衆生入無間獄是故當知執空破相  
皆是魔屬智度論曰譬如田舍人初不識鹽見人以  
鹽著種種肉菜中而食問言何以故爾語言此鹽能  
令諸物味美故其人便念此鹽能令諸物味美自味  
必多便空鈔鹽滿口食之鹹苦傷口而問言汝何以

言鹽能作美人言痴人此當籌量多少和之令美云  
何純食無智人聞空解脫門斷諸善根亦復如是思  
之思之任爾一切空生死空爭奈閻羅大王空不得  
何

七隨緣墮者謂古人云隨緣消舊業任運著衣裳但  
順天真萬行自圓舉足下足誰非淨業何用種種作  
爲答先德問曰卽心是佛何假修行答祇爲是故所  
以修行如鐵無金雖經煅鍊不成金用賢首國師曰  
今佛之三身十波羅蜜乃至菩薩利他等行並依首  
法融轉而行由衆生心中有真如體大相大用大今

日修行引出法報身等由衆生心中有真如法性自  
無慳貪今日修行順法性無慳引出檀波羅蜜等涅  
槃經佛告師子吼菩薩一切衆生皆有念心慧心發  
心勤精進心心定心如法等法雖念念滅猶故相  
似相續不斷故名修道乃至如燈雖念念滅而有光  
明除破暗冥如衆生食雖念念滅亦能愈病日月光明雖念  
飽滿譬如上藥雖念念滅亦能愈病日月光明雖念  
念滅亦能增長草木樹林寶積經曰若無正修者猫  
兔等亦應成佛牛頭融大師曰若言修生則造作非  
真若言本有則萬行虛設長者論曰若一槩皆平則



無心修道應須策修以至無修慈愍三藏錄曰若言  
世尊說諸有爲定如空華如何勅諸弟子勤修六度  
萬行妙因當證菩提涅槃之果豈有智者讀輒闍婆  
城堅實高妙復勸諸人以兔角爲梯而可登陟乎由  
此理故雖有漏修習是實是正如達磨對梁武之言  
爲彼貪著有爲因病發藥何得以一期之語廢佛道  
業且諸經中所謂不住相戒施等者謂有而不住耳  
有而不住故作而無作今以本無爲不住如下里乞  
兒向人言吾不以富貴驕人豈非夢語又復執言無  
作者將須稿心枯體如鑄金像等和抑猶酬酢應對

如常人和若酬酢應對者應非無作若言不乖無作  
者觀佛禮念本自天真豈應獨乖二義不成卽大妄  
語是故當知隨緣任運非是無作若無作是隨緣者  
蚓壤蛙泥亦是隨緣何不成佛錯認祖機執磔爲玉  
與市井兒所宗之無爲教何以異哉

八唯心墮者謂自性淨土卽俗恒真七覺瓦礫一道  
平等但淨自心何須分別答汝言心淨土淨不須分  
別者引汝入廁室中能久住不入死屍場穢氣熏灼  
不掩鼻不與疥癩膿血之人能同應器及床褥不若  
不能者此相卽是厭五濁相若居住尚須淨室同遊

尚宜淨侶者此相卽是忻淨土相忻厭熾然何謂平等縱汝難忍能忍如上所說種種濁穢不求遠離則諸蜚蝗鴉犬亦能親近此種種物豈皆得道脫汝淨穢俱離依然取捨于唯心義亦不相應是故當知諸佛以唯心故忻厭出生以唯心故說名平等以唯心故莊嚴佛土若不唯心豈能隨念若非平等凡夫無分穢尚不捨何獨捨淨捨既是心取亦何乖皆由不了佛旨致斯妄執但識惟心疑義斯遣

九頓悟墮者今世禪人皆云一超直入不落功勛尚不求作佛何況往生答言不求作佛者捨身之後將灰斷永滅邪抑尚受後有邪若受後有者爲生淨土邪爲生三界邪若居三界卽不如淨土若淨土者卽同往生又先德曰夫善知識者雖明見佛性與佛同等若論其功未齊諸聖須從今日步步資熏又云未悟而修非真修也唯此頓悟漸修旣合佛乘不違圓旨如頓悟頓修亦是多生漸修今生頓熟此在當人時中自驗若所言如行所行如言量窮法界之邊合虛空之理八風不動三受寂然種現雙銷根隨俱盡譬諸無病不應服藥如或現行未斷煩惱習氣又濃寓目生情觸塵成滯雖了無生之義其力未充不

可執云我已悟了煩惱性空若起心修却爲顛倒然則煩惱性雖空能令受業業果無性亦作苦因苦痛雖虛祇麼難忍如遭重病病亦全空何求醫人徧服藥餌祖師云將虛空之心合虛空之理亦無虛空之量始得報不相酬汾陽無業禪師云如今天下解禪解道如河沙數說佛說心有百千萬億纖塵不盡未免輪迴絲念不忘盡從淪墜如斯之類尚不能自識業果妄言自利利他自謂上流並他先德但言觸目無非佛事舉足盡是道場原其所習不如一個五戒十善凡夫觀其發言嫌他二乘十地菩薩且醍醐上

味爲世所珍遇斯等人翻成毒藥假使才並馬鳴解齊龍樹只是一生兩生不失人身臨命終時一毫聖凡情量不盡纖塵思念未忘隨念受生輕重五陰向驢胎馬腹裏托質鑊湯爐炭裏燒煮從前記持憶想見解一時失却依舊再爲螻蟻從頭又作蚊虻雖是善因而招惡果圓悟和尚曰生死之際處之良不易唯大達超證之士一徑截斷則無難然此雖由自己根力亦假方便于常時些小境界轉得行打得徹踐履將去養得純熟到緣謝之時自然無怖畏是故古德坐脫立亡行化倒蛻能得勇健皆是平昔淘汰得

淨香林囚十年得成一片湧泉四十年尚有走作石  
霜勸人休去歇去古廟香爐去永嘉云體卽無生了  
不無速蓋兢兢業業念茲在茲方得無礙自在旣捨  
生之後得意生身隨自意趣後報悉以理遣不由業  
牽所謂透脫生死者邪當知諸大師密密履踐祇是  
圖個生死好處路雖不同期于終淨一也往有狂僧  
自負見他余問之曰汝信得出家不信得身在長安  
不僧愕然曰惡得不信余曰汝夢中或夢未出家時  
見父母兄弟時或爲稚子嬉戲時是時知身在客不  
僧曰不知余曰論汝信得出家及與行脚可是極明

極徹汝見道明白當不過此然纔到枕上返僧爲俗  
易客爲家已自不知何況生死長夜靠汝些子見地  
焉能保其不顛倒也時僧悚然

十圓實墮者謂華藏世界一刹一塵具含無量國土  
本無淨穢焉有往來故長者言西方淨土是權非實  
以情存取舍非法界如如之體故答若約真論則華  
藏世界亦是權立何獨西方如論中言理智無邊各  
之爲普知隨根益稱之曰賢是普賢菩薩亦權也文  
殊師利是自心善簡擇妙慧覺首目首等菩薩是隨  
信心中理智現前是文殊菩薩等亦權也又如此方

聖賢尼父顏淵等論中皆云此是表法本無是人是一切賢聖皆權也今試定量文殊普賢及與此方賢聖權邪實邪若言權則現有其人及諸遺言往行若言實則是長者誑凡滅聖犯大妄語于此辯得西方亦入剎塵剎塵亦含西方豈有權實又若論中云蓮華藏體是法身隨行無依住智體之所報得宮殿總大悲含育之所報得樓閣卽是智照觀根順悲濟物之所報得其地金剛平等自性法身之所報得摩尼莊嚴法身戒體隨行報得金剛輪圍山大悲戒防護之業之所報得衆華莊嚴萬行利生開敷之所報得

寶樹建行利生覆蔭古識之所報得但業不相應者同住居而不見猶如靈神及諸鬼趣與人同處人不能見若爾則所謂華藏世界者與汝所見之剎塵同邪異邪若云同者曰連鷺子視聽尚隔若云異者何名一真又如僧靈幹志奉華嚴作華藏觀及彌勒天宮觀至于疾甚目睛上視若有所見童真問之答曰向見童子引至兜率天宮而天樂非久終墮輪迴蓮花藏是所圖也言終氣絕須臾復甦真問何所見幹曰見大水遍滿花如車輪而坐其上所願足矣言終而逝故清涼國師云觀行則天童迎而大水瀾漫此

與西方往生爲同爲別是故當知漏卮勺海螢火焚  
山徒益疲勞諸有智者不應如是分別

六夢居士洪淳熙校

谷一頁又中曾寫年  
休異麻昔云同昔日  
諸良昔爾限旭甯華  
同卦錄而不見辭收  
寶錄書行味坐費

西方合論卷之九

第九修持門

夫積劫情塵多生愛海似蝕劍之苔花若吞珠之泥  
繡無礪不吐去垢方明欲得心淨除非穢滅悟者常  
須覺觀迷人勤加折伏其或愛鑽貪枷亦當勸年惜  
月孔子曰困而不學民斯爲下今欲一生超僧祇之  
果十念攝億萬之程豈是窟見浮思結心塵口所能  
超越不捩一忍空累多生如法而修免墮魔罟

一淨悟門

二淨信門

三淨觀門

四淨念門

五淨戒門

六淨願門

七淨戒門

八淨處門

九淨侶門

十不定淨門

一淨悟者行者欲生實淨土當真實參究如法子悟何故悟是迷塗導師如人入暗當燃燈炬悟是淨國

圖引如人行遠當識郵程悟是諸行領首如人衝堅當隨將帥一者悟能了知卽穢恒淨不捨淨故二者聞淨佛國土不可思議不怯弱故三者知畢竟空中因果不失一切惡法不更作故四者知彼土不去不來此亦不去不來故五者悟佛身量遍滿虛空衆生身量亦徧滿虛空如地獄業力一人亦滿多人亦滿故六者聞阿僧祇劫無量諸行人說彈指頃事不驚怖故七者修十善三福不住人天故八者如覺後憶夢中事不作有無解故九者如眼見故鄉信不信不可得故十者知法無我順性利生直至成佛無

疲厭故菩薩入此門已成就白法隨意得生是故觀  
經上品云深解義趣于第一義心不驚動疏云第一  
義者謂諸法實相言語道斷心行處滅又上品六念  
義云安心不動名之爲念鈔曰第一義理悉不爲二  
邊所動通名爲念故西方如韋提希善財龍樹等以  
入地往生此方如遠公智者永明等以證悟往生一  
切經論中廣載不能具錄論中或有言生彼求悟者  
爲中下人說至言悟自己佛不必求生此則爲十地  
菩薩以上說若云悟第一義諸結使未斷者皆不求  
生則如龍樹永明等亦爲捏目生花無事多事矣

二淨信者智度論曰若人心中有信清淨是人能入  
佛法若無信是人不能入譬如牛皮未柔不可屈折  
無信人亦如是又經中說信爲手如人有手入寶山  
中自在能取若無手不能取信亦如是昔王仲回問  
無爲子曰如何念佛得無間斷無爲子曰一信之後  
更不再疑卽是不間斷也仲回欣躍而去未幾得生  
還來致謝是故若人修行未能頓悟當深植信根不  
驚不動一者信金口誠言決定當生故二者信自心  
廣大具有如是清淨功德故三者信因果如形影決  
定相隨故四者信此身形識及一切世界建立如陽



飲空花無所有故五者信五濁惡世寒熱苦惱穢相  
熏炙不容一刻居住故六者信一切法唯心如憶梅  
舌酸故七者信念力不可思議如業力故八者信蓮  
胞不可思議如胞胎故九者信佛無量身無量壽無  
量光不可思議如蟻子身蜉蝣歲螢火光同一不思  
議故十者信此身決定當死故若人具有如是信根  
舉足下足無非念佛故知信之一字通上中下但信  
有大小若無甚深信力如無羽之鳥決定不得飛故  
三淨觀者衆生無始垢穢遍一切法如麵入沙似金  
在鑛修淨業者當加種種觀行磨鍊習氣爲白法之

垣壇作往生之津梁一淨觀謂觀佛相好如十六觀  
經所說故二不淨觀謂觀身心不淨器世界不淨生  
厭離故三無常觀謂觀一切法無定如一美色姪人  
觀之爲樂妬婦觀之爲苦觀行人觀之種種惡露異  
類觀之如土木故四和合觀謂觀是身是世界是見  
聞覺知如積木爲屋積土爲壘積雜彩爲畫無實體  
故五對治觀謂觀自身何結最重當用何法對治如  
輕冷苦澁藥草飲食等於熱病中爲藥於餘病非藥  
輕辛甘熱藥草飲食等於冷病中爲藥於餘病非藥  
如是觀察對治故六慚悔觀一切衆切衆生無量劫

西九念諸第  
四  
來與我互爲父母兄弟姊妹男女通相姪毒曾不覺  
知如梟獍殺父母牛羊鴿雀配其親屬彼不自知而  
人觀之慚媿譏笑諸佛菩薩見于我等亦復如是是  
故當生大悔恨故七念念觀謂觀一切時中幾許憶  
念佛心幾許利生心幾許垢淨沉掉心故八平等觀  
謂觀一切色一色無好醜故一切聲一聲無譽毀故  
一切受一受無恩仇故一切義一義無淺深故九微  
細觀謂觀佛法念起于何來去于何往故十法界  
觀謂觀一毛一塵一草一木皆具有無量淨佛國土  
故行者若行諸觀時以第一淨觀爲主餘九爲伴如

石中覓珠若不破石無緣得珠故

四淨念者念佛之法名一行三昧惟在決定若不得  
念卽有散漫三昧不成一攝心念謂一切處攝念不  
忘縱令昏寐亦繫念而寢不隔念不異念故二勇猛  
念如好色人聞姪女所在高厓深澗燐途虎窟必往  
不怯故三深心念如大海深廣必窮其底覺路遙遙  
不竟不休故四觀想念謂念中見三十二相八十  
隨形好故五息心念謂息一切名心宦心慾心世間  
心貪戀心貢高心遮護心人我是非心念佛故六悲  
帝念每一想佛身毛皆豎五內若裂如憶少背之慈

母及多慧之亡兒故七發憤念如落第孤寒負才寂寞每一念及殆不欲生故八一切念謂聞見覺知及與毛孔骨髓無一處不念佛故九參究念謂念佛一聲便念此聲落處故十實相念謂不以有心念不以無心念不以有無心念不以非有無心念故是爲上品念佛門若如是念佛者現生必得見佛

五淨懺者經云前心起罪如雲覆空後心滅罪如炬破暗又云百年垢衣可于一日浣令鮮淨是故欲除重障當勤懺悔一內懺謂懺心意識不淨因故二外懺謂懺一切色一切聲一切不淨法故三事懺謂懺

十八界二十五有八萬四千種種塵勞結使障學阿僧祇劫見佛利生諸行業故四理懺謂懺入道以來所得狂解所學經論所聞與義作止任滅等病障佛無漏智故五過去懺謂懺無始世界所作黑業如今生雖不偷盜但所求不如意卽是盜業未盡今生雖不邪淫但值不隨意眷屬卽是姪業未盡今生雖不謗法妄語但言出人或疑信相半卽是謗法及妄語業未盡於一切果中察一切因當知前生無惡不造一一當懺悔故六未來懺謂一切惡法卽今便止盡未來世永不相續故七現在懺謂懺現在世所有生

老病死種種苦業種種煩惱業舉足下足業起口動  
心業一切微細不可稱量業故八剎那懺謂一念中  
有九十剎那一剎那有九百生滅一生滅一懺故九  
究竟懺謂等覺位中有一分無明猶如微煙究竟洗  
滌故十法界懺謂法性中無我無人普爲十方過現  
未來一切衆生懺故若能如是真實懺者一切障礙  
悉得消滅不離道場得見諸佛

六淨願者智度論曰諸菩薩見諸佛世界無量嚴淨  
發種種願有佛世界都無衆苦乃至無三惡之名者  
菩薩見已自發願言我作佛時世界無衆苦乃至無

三惡之名亦當如是有佛世界七寶莊嚴晝夜常有  
清淨光明無有日月便發願言我作佛時世界常有  
嚴淨光明亦當如是有佛世界一切衆生皆行十善  
有大智慧衣被飲食應念而至便發願言我作佛時  
世界中衆生衣被飲食亦當如是有佛世界純諸菩  
薩如佛色身三十二相光明徹照乃至無有聲聞辟  
支佛名亦無女人一切皆行深妙佛道遊至十方教  
化一切便發願言我作佛時世界中衆生亦當如是  
如是等無量佛世界種種嚴淨願皆得之以是故名  
願受無量諸佛世界問曰諸菩薩行業清淨自得淨

報何以要須立願然後得之譬如田家得穀豈復待  
願答曰作福無願無所標立願爲導御能有所成譬  
如銷金隨師而作金無定也如佛所說有人修少施  
福修少戒福不知禪法聞人中有富樂人或聞欲天  
色天心願樂者命終之後各生其中菩薩亦如是修  
淨世界願然後得之以是故知因願受勝果復次莊  
嚴佛界事大獨行功德不能成故要須願力譬如牛  
力雖能挽車要須御者能有所至淨世界願亦復如  
是福德如牛願如御者問曰若不作願不得福耶答  
曰雖得不如有願願能助福常念所行福德增長以

是義故修淨佛國土者當發大願一者不爲福田故  
願願爲一切衆生蔭生淨土故二者不爲眷屬故願  
願治一切如來家生淨土故三者不爲病苦故願願  
醫一切世間無明等瘡生淨土故四者不爲轉輪王  
故願願轉諸佛如來法輪作大法王生淨土故五者  
不爲欲界故願願離一切微妙五欲生淨土故六者  
不爲色界故願願離一切禪着生淨土故七者不爲  
無色界故願願盡種種微細流注證無量相好身生  
淨土故八者不爲聲聞辟支故願願以福智二嚴饒  
益一切衆生生淨土故九者不爲一世界于世界故

願願代無央數世界苦拔一切世界衆生淨土故  
十者不爲一阿僧祇劫千阿僧祇劫衆生故願願代  
無量無數阿僧祇劫衆生苦拔一切衆生淨土故  
若能如是發大願者最後剎那決定當如普賢願中  
所說是故當知願爲截苦海之舟航蕙極樂之明師  
故

七淨戒者一切淨法以戒爲址如人作舍先求平地  
如畫師畫諸山水先治光明素練然後着彩戒亦如  
是是故戒爲諸善法之首入淨國之初門若不持戒  
如惡露敝女欲入齋壇無有是處一慳貪戒謂行財

命二施及與法施無愛惜故二毀禁戒謂五戒律儀  
戒乃至無漏戒滿足持故三嗔恚戒謂以忍調心及  
于身口若遇惡口刀杖所加但自思惟業因緣法作  
償負想作薰師想作風寒冷熱想故四放逸戒謂生  
死險道無放身處如人持滿油鉢行懸繩上不得左  
右顧視及生第二念故五散亂戒謂守攝諸根息諸  
緣影如護風燈如防生鳥故六愚痴戒謂以智慧破  
諸迷悶如作務人常借日光若是長夜諸作皆廢故  
又如登覽當用開目若是盲人及與睡眠諸山河大  
地與無等故七憍慢戒謂不應以才辯故貢高不應

以悟解故貢高不應以諍論故貢高一切所得如大地上塵如鏡面上垢不應以此垢驕彼垢故八覆藏戒謂一切處諸佛一切處菩薩一切處神明無可覆故如日中逃影波中逃濕沙中逃塵無可逃故九無益戒謂一切嬉戲事無益一切詩文無益一切塵緣無益一切口解脫無益當遠離故十不住戒謂如上持戒但爲生淨土饒益衆生不求聞譽法及諸人天二乘果故菩薩如是行于淨戒則能攝諸衆生生于淨土何以故一切衆生雖至冥頑莫不欽仰戒德故八淨處者學道之人既有志出塵應當捨諸惡處若

不捨者應是厭離未極若厭離未極者應是忻淨土未極龍樹曰菩薩心不貴轉輪聖王人天福樂但念諸佛是故隨心所重而生佛土今小小適意處尚不能捨何況轉輪聖王如縛足欲行繫翅求飛去住皆累兩心虛縈一繁華喧闐處當遠故二歌樓酒肆處當遠故三熟焰薰灼處當遠故四論除目及朝事處當遠故五恩愛纏縛及熟遊歷處當遠故六詩壇文社鬪章摘句處當遠故七譏刺古今較長競短處當遠故八講無義味道學處當遠故九義解家鬪名相矜小智之處當遠故十宗乘狂解妄談頓悟輕視戒

律之處當遠故是等撓道與魔不異是故當遠行者  
若離是諸處一切道業卽當成辦

九淨侶者一切悟機非友不發一切惡法非友不止  
如車二輪去一則蹶是故世間文字諸戲論法尚須  
同心印正何況志求無上大道因緣經曰譬如風性  
雖空由栴檀林簷葡萄林吹香而來風有妙香若經糞  
穢是屍而來其風便臭又如淨衣置之香篋出衣衣  
香若置臭處衣亦隨臭友亦如是是以行道求友者  
當嚴別淨穢一山林閑適之友當近能止躁心故二  
嚴持戒律之友當近能淡諸慾故三智慧廣大之友

當近能出迷津故四總持文字之友當近能決疑難  
故五寂寞枯槁之友當近能悟進取故六謙卑忍辱  
之友當近能銷我慢故七直心忠告之友當近能抑  
諸過故八勇猛精進之友當近能速道果故九輕財  
好施之友當近能破大慳故十仁慈覆物不惜身命  
之友當近能推人我等執故若無如是淨侶卽當屏  
人獨處自辦道業以像設爲師以經論爲侶其他嬉  
戲之徒寧絕勿通如人園中雖無佳花不值臭草以  
無益賞心徒增厭穢故

十不定淨者一切衆生根器利鈍不同如上諸法皆



是上根利器方得具足是故如來有甚方便開九品之門分上中下修習三等一者或解義諦未全伏惑或不深解但能誦讀諸經故二者或但依語生信或因他生信或遇貧窮折辱生信故三者或觀金像或隨意觀一相故四者或晨朝十念百念乃至千念故五者或但懺諸愆重習氣及十不善業故六者或爲怖生死發願往生或遇苦難發願往生但不得作人天及諸福德願故七者或但持八戒五戒乃至但戒殺盜婬妄故八者一切喧場不能卒離但時時生厭離心故九者於諸世法中人不能卽斷但不隨順故

十者如觀經下品中說或但臨終十念故如上諸法但能至心受持一法者皆得往生唯不得疑信相參若有疑者一切諸行悉不成就如人夜中獨趨遠道不得生疑是故衆生聞法疑者不如不聞何以故彼無聞者但不聞法非有障難此則自作障難故

無諍居士黃輝校

西方合論卷之九 終

60 1 2 3 4 5 6 7 8 9 70 1 2 3 4 5 6 7 8 9 80 1 2 3 4 5 6 7 8 9

要會錄

夫西方大旨經中自明淨土要門諸論具釋如天親  
智者海東越溪等皆抉發幽微舉揚宗趣近則雲棲  
和尚所著小本疏鈔條分類析精宏淵博真照夜途  
之長炬截苦海之輕舟諸師所發已無餘蘊但諸經  
中隨時立教逗根說義時有差別致生學者疑畏今  
略為拈出博採諸論附以管見會歸一處以便叅攷  
一刹土遠近釋  
二身城大小釋

西方合論卷之十

十釋異門

夫西方大旨經中自明淨土要門諸論具釋如天親  
智者海東越溪等皆抉發幽微舉揚宗趣近則雲棲  
和尚所著小本疏鈔條分類析精宏淵博真照夜途  
之長炬截苦海之輕舟諸師所發已無餘蘊但諸經  
中隨時立教逗根說義時有差別致生學者疑畏今  
略為拈出博採諸論附以管見會歸一處以便叅攷  
一刹土遠近釋  
二身城大小釋

三壽量多少釋

四花輪大小釋

五日月有無釋

六二乘有無釋

七婦女有無釋

八發心大小釋

九疑城胎生釋

十五逆往生釋

一刹土遠近者問大小本經皆云西方去此十萬億  
刹觀經獨云阿彌陀佛去此不遠二說誰正釋以遠

近無定故故言亦遠亦近何故凡言某方者某方至  
某方至某方幾城幾刹者是從色身建立身相虛故  
是故所計方向道里亦皆不實不得言誰近誰遠如  
滇人言燕地遠是從滇計故燕實無遠齊人言燕地  
近是從齊計故燕實無近又如十步之地蟻子卽遠  
大象卽近不應言遠是實何故是地不當從蟻計故  
亦不應言近是實何故是地不當從象計故又則計  
十步者亦非是實何故是地既不從蟻不從象亦不  
當從人計故智度論曰隨世俗所傳故說有方方實  
不可得問曰何以言無方是方亦有亦常如經中說

日出處是東方日沒處是西方日行處是南方日不行處是北方日有三分合若前合若今合若後合隨方日分初合是東方南方西方亦如是日不行處是無分答曰不然須彌山在四域之中日繞須彌照四天下鬱恒羅越日中是弗婆提日出於弗婆提人是東方弗婆提日中是閻浮提日出於閻浮提人是東方是實無初何以故一切方皆東方皆南方皆西方皆北方汝言日出處是東方日行處是南方日沒處是西方日不行處是北方是事不然問曰我說一國中相汝以四國爲難是以故東方非無初答曰若

一國中與東方合是爲有邊有邊故無常無常故是不徧以是故但有方名而無實是則方所尚不可得豈有程途然亦不廢方所及程途故何故以不當從閻浮提計亦可卽閻浮提計故如日雖非東西出沒亦可言東出西沒故

二身城大小者問聲王經曰阿彌陀佛與聲聞俱其國號曰清泰聖王所住其城縱廣十千由旬觀經曰佛身高六十萬億那由他恒河沙由旬眉間白毫右旋宛轉如五須彌山佛眼如四大海水今計一海八萬四千由旬四海合三十三萬六千由旬身過其眼

五百六十萬由旬計所住城尚少于眼三十二萬六千由旬何況其身不應身城懸絕如是釋海東疏中亦有此問疏曰彼佛有衆多城隨衆大小城亦大小大城之中示以大身小城之中現以小身聲王經言十千由旬者是與聲聞俱住之城當知佛身相當而住觀經所說身高大者當知其城亦隨廣大與諸大衆俱住處故先德云法華中淨光莊嚴土唯演頓故淨名中衆香佛土純菩薩故所以彼佛但現高大之身若安養土頓漸俱談聲聞菩薩共爲僧故故使佛示生身法身二種之相三十二相通于生法大小共

見若八萬相局在法身大乘賢聖方得見也是故應以藏塵尊特之相得四益者佛爲稱機現藏塵尊特身應以八萬尊特之相得四益者佛爲稱機現八萬尊特身應以三十二尊特之相得四益者佛爲稱機現三十二尊特身如毗盧遮那聲聞視聽隔于對顏不妨菩薩更見大身故佛身隨所被機大小如日光隨隙分大分小而是日光無大小故

三壽量多少者經云彼佛壽命無量無邊阿僧祇劫又云彼佛至般泥洹時觀世音菩薩乃當作佛既當入滅卽是有量釋先德云藏通補處彰佛有量別圓

補處顯佛無量以十方三世一切如來更無彼此迭  
相見故同一法身一智慧故菩薩機忘如來應息名  
補佛處實異藏通前佛定滅後佛定生故金光明四  
佛降室疏乃釋云若見四佛同尊特身一身一智慧  
卽是常身弟子衆一故若見四佛佛身不同卽是應  
化弟子衆多故故知全法界身非生非滅豈得豎分  
當現橫論彼此旣非生滅無量義成且淨佛刹中塵  
刹水樹皆是佛身故經中云是諸衆鳥皆是阿彌陀  
佛變化所作智度論曰衆生甚多若佛處處現身衆  
生不信謂爲习化心不敬重有衆生從人聞法心不

開悟若從畜生聞法則便信受如本生經說菩薩受  
畜生身爲人說法人以說法希有故無不信受有人  
謂畜生是有情之物以樹木無心而有音聲則皆信  
受以是故水樹禽鳥皆是佛身變現故若佛壽量有  
盡者道場國土及諸水鳥音聲亦應有盡若有盡者  
不應有補若無盡者不應言滅如虛空分齊非有分  
齊非無分齊以不思議智照之可得

四花輪大小者小本曰池中蓮華大如車輪觀經云  
一一池中有六十億七寶蓮華團圓正等十二由旬  
大本云池中蓮花或一由旬乃至百由旬千由旬夫

西苑合論卷一  
五  
人世車輪大不逾丈縱復輪王千輻金輪縱廣不過一由旬何得大小相懸乃爾釋花輪大小亦如身城以衆生機有大小故身城水樹現有大小蓮華亦然如初地化百佛刹見佛百葉花二地化千佛刹卽見千葉三地萬葉四地億葉五地千億六地百千億七地百千億那由他八地百千萬三千大千世界微塵數九地百千萬億阿僧祇國土微塵數十地十不可說百千億那由他佛微塵數以自受用身有大小故見花亦爾非是花有大小故嘗聞僧言海邊有阿育王舍利塿衆生見者光明各異有見無光者有見光

如細豆許者有見如棗炬者有見如指頂大者有大如斗者如斗者千不一見衆生同一肉眼所見尚異何況菩薩聲聞乃至人天等功用懸絕所感花輪焉得不殊如此土中刹利貴種飛樓傑閣遍滿城邑寒微煖子做茅土窟乃至不得不應難言大小懸殊何故是自福德所招故寶池花相應亦如是

五日月有無者諸本或言日月處空或言處空而不運轉或不言有無或直言無有又經曰彼佛光明普照佛刹無量無數不可思議映蔽日月諸聲聞衆皆有身光能照一尋菩薩光照極百千尋二菩薩光明

常照三千大千世界如是雖有日月如燭火之處大  
陽豈有光照若日月不能照者應無晝夜何故經言  
晝夜六時及與清旦食時等事明知亦是權說借此  
晝夜喻彼時分非爲實事且晝夜往來者是衆生心  
明暗傾奪感有此相故淨佛國土不應有此如忉利  
而上尚不假明月何况極樂縱令有者亦是彼化  
國衆生色空見未盡現有如是日月相故而實佛土  
無有日月如大論曰釋迦文佛更有淨國土如阿彌  
陀佛阿彌陀佛亦有不嚴淨國如釋迦文佛此卽隨  
機感說亦不妨說有故

六二乘有無者問天親菩薩無量壽偈曰大乘善根  
界等無譏嫌名乃至不聞二乘名何況有實是諸經  
中皆言國土聲聞不可稱量何故釋先德云二乘生  
者皆是臨終回小向大以習小功深聞佛所說及風  
柯水響皆演小故暫證小果漸次增進至菩薩位非  
是住小是故說無二乘者有二義一是決定二乘不  
生是實無故二是不住二乘是畢竟無故譬如二人  
同官卽署一人官止于此一人將遷止卽署者可以  
稱卽以無後官故將遷官者不定是卽以卽畢竟改  
故以是故淨土不得言有二乘以畢竟至菩薩位故



七婦女有無者聲王經中阿彌陀佛亦有父母何得  
言無女人釋此亦化作如化鸚鵡海東疏曰聲王經  
說安樂世界阿彌陀佛有父母者是變化女非實報  
女又復雖有父母而非胎生實是化生假爲父母如  
彼經言若四衆能正受佛之名號以此功德臨命終  
時阿彌陀佛卽與大衆住此人所令其得見見已慶  
悅倍增功德以是因緣所生之處永離胞胎穢欲之  
形純處鮮妙寶蓮花中自然化生具大神通光明赫  
奕當知父母假寄之耳或說聲王經中說有父母是  
顯彼佛所住穢土是義不然何故彼經旣說寶蓮化

生又言一菩薩侍立左右此等悉是淨土相不異觀  
經所說故當知彼經所說提婆達多及魔王等悉于  
淨土變化所作不由此等爲非淨土如化畜生非穢  
土故

八發心大小若魏譯三輩之中皆有發菩提心觀經  
下品直言十念諸經互異今欲和會者諸經皆是發  
大菩提心以爲因故何故若是最初無大因者其人  
雖復經耳亦生疑難何得頓聞頓信是故當知下品  
十念者亦是宿植大因後生退墮故其臨終遇善知  
識如早苗得雨萌芽頓發故若無因者知識尚不得

遇何況信受如聰慧貴遊之士多有愈聞愈不信者  
卽知一聞頓念非見小緣不應以一生作惡便謂此  
人無大因故經云世間人民得聞阿彌陀名號若慈  
心喜悅毛髮聳然淚卽出者皆是累世常行佛道或  
他方佛所嘗爲菩薩是故不論顛愚黠慧凡至心念  
佛者皆是多劫深植善根發大菩提心故何故所謂  
善根者不專言智慧若復無根如種焦穀豈有芽出  
如世間奕棋小事有無知賤流頓學頓精者有智士  
習之終身居末品者卽知是因小技無因尚不得入  
何況大法是故若有信是希有難信之法者是人卽

是大心菩薩故

九疑城胎生者元魏譯曰若有衆生墮于疑悔積集  
善根希求佛智普遍智不思議智無等智威德智廣  
大智於自善根不能生信由聞佛名起信心故以此  
因緣於五百歲處花胎中猶如苑觀宮殿之想不見  
佛不聞法是名胎生魏譯曰不了佛智然猶信罪福  
修習善本願生其國是故胎生宋譯曰衆生所種善  
根不能離相不求佛慧妄生分別深著世樂人間福  
報是故胎生王氏本曰若有衆生修諸功德願生彼  
刹後復疑悔不信有彼佛刹不信作善得福其人雖

爾續有念心暫信暫不信臨命終時佛乃化現其身  
令彼目見以心悔故其過差少亦生彼刹是謂胎生  
今按前二譯但不信自性不了佛智名胎生故宋譯  
則直言修善求生人天者爲胎生極樂國中無胎生  
故若王氏則又以不信佛刹不信罪福暫信暫不信  
爲胎生異前譯中聞名起信及修習善本二種往生  
大約淨土中畧言九品廣言千萬品亦不能盡如今  
生人中者種種福報種種罪業各各不同是故諸譯  
雖互異皆爲實語就中元魏譯旨趣尤奧以不信自  
善根故依他起信卽是疑城信自善根者卽頓了自

心不從他得以入悟方能脫疑是故未悟而修終隔  
疑胎胎以累蔽爲義未悟之人諸障未徹合得是報  
此等當在中下上品攝何故下品後二種經歷六  
劫十二劫方得花開此但五百歲故若如王本則信  
佛猛利未若最後二種又所生在其刹邊地不應五  
百歲得見佛故


十五逆往生者大經曰唯除造五無間惡業誹謗正  
法及諸聖人觀經則五逆十惡臨終十念皆得往生  
當知大經揀五逆者以誹謗故何故入淨土以信爲  
導師誹謗是信之賊如水無所不容但不容火以火

自不能容故如風無所不入但不入石以石自不堪  
入故誹謗之人燒正法如猛焰障佛智如鏡壁是故  
法海慧風無因得受觀經揀誹謗不揀五逆者義同  
文異以五逆雖至惡尚無決定不信之見不應揀故  
然有大心之人始或不信後因啓發猛省前失如韓  
昌黎始斥佛骨後皈依大顛張無盡初詆佛書欲著  
無佛論後觀淨名經大有省發卒爲宗門龍象尤是  
法中希有之事是故儒林英特或有謬聽先入誤謗  
佛法但速圖改悔卽是盛事不應以謗爲障難故

西方合論卷之十終

無諍居士黃輝校





西方名品圖彙下